

ANNABI DANIELI



The book of the prophet Daniel in Kyanga, as recorded in the books of the prophets: Daniel chapters 1-7, 9-10, 12.

Danieli gbɛɛgũna Babila kiri ibaa

Yahuda kiri Yoakimu kirikena wɛ̃̃ adibilu, Babila kiri Nebukaneza nù ì lîka Urusalimaji. Ye Zɔnadi kiri Yoakimu nà'ini ì ɔɔlu kũni Ladu kpɛ fɔ kenazɔ, ye ì yàzɔ Babilonia cɛrelu, ì kà a dɔma kpɛ bandaabulu.

Ye kiri ginaa fî a wei taashikada Ashepenazani ina nu kũni Isra'ila jinginaɔ ka bii kiri koo gbādanadi bee, nigɔ̃ni nɔɔ larubadina ka à dabali bùru àna yāpai dada ànagũ wereguna zɔ, gũna ka à dɔnaa tà lafa faala, mɔnɔ à waani bùru àna dîkinake kiri wei. Taashikada ginaa ye ì Babilonia yā dadaa'àni kũni ì kyoɔzɔ. Fɔbinaa ka kiri tà bi dipai ì gîfa wòna gbiri'àni kũni inabi'izɔ ka ita mi, wòna yādada'àni hari wɛ̃̃ à, bɛɛ gbɛ̃ji àna dikinaake'ani. Yahuda bè kena bii'àlu, Danieli kũni Ananiazɔ kũni Misaelizɔ kũni Azaliazɔ. Taashikada ginaa ì à tɔ sòrì'àni. Ì tɔkà Danielini Belasaa, Anania kîn Sadaki, Misaeli kîn Mesaki, Azaria kîn Abedinego.

Danieli bòwi a zūnlu ka aba kiri fɔbinaa biaba koo aba ì inabi'i mia àna gbācikeba, ye ì jɛɛ wotukè taashikadama àna fɔbina ginaa tu gubɛ. Ladu tù taashikada ginaa gucɛkɛkɛ Danielini, ì ì indawɛrɛ wà, ye ì ke'ini: Mabi ma zɔnadi ma kiri wohumaa, zaaka ini ye a fɔbinaa kũni a izɔ dî. Inaa wà n werɛlu cirina ì kpà n saaranala kîn? Ñ tua yā ginaa nà wi ma miima kiri watalu. Taashikada ginaa toroda dî ina laakalike Danielima kũni Ananiazɔ kũni Misaelizɔ kũni Azaliazɔ, ye Danieli fî'ini: Woninɔ n zɔkedana yɔ̃ di koori n wà. Ngũ du sɔ̃badi kpawoni kũni icicinɔ, n wo kwatancike kũni jinginaɔ

ka àbi fɔbina duu bia kũni kirizɔ, n̄ kewoni laaka n wà. Ì wì'aji yā ginaama, ye ì à tù gube hari di koori.

Ka di koori ginaa fà, ì waadɔ'aji ì wà à bii baani, à kānaa kpà jingi kenala ka bi fɔbina duu bia kũni kirizɔ. Ye à toroda ginaa ci kiri fɔbina kũni ì inabi'izɔ kpa'ani mɔnɔba, sai du sɔbadi. Ladu jingi shiinanɔ gbà dɔnaa kũni werɛgunaazɔ. À kyo kũni dabalizɔ dɔ̃ pai. Danieli kīn ì werɛfugu kũni nananaazɔ furunaa dɔ̃.

Ka wɛ̃ à ka kiri Nebukaneza dī wò yādada jinginanɔni le bùru, ye taashikada ginaa yà'azɔ ì gu. Ka kiri dirabù'azɔ, ye ì wà Danieli kũni Ananiazɔ kũni Misaelizɔ kũni Azaliazɔ saara zɔ àluba, ye à gbèegū ì ibana. Kiri yālalu'ama dabali kũni dɔnaazɔ yā musu pai, ye ì wà à kpà masukedanala kũni werɛgudana ka bii ì cerelu pai tara koori. Danieli bii gube hari Sairushi kirikena wɛ̃ farashinaalu.

Nebukaneza nanana dunia kirikena musu

Nebukaneza kirikena wɛ̃ fiadibilu, ì nàna. Nanana ginaa yā ì ì kũ gbāda, ici fɔ ina iwereke mɔnɔba. Ye ì ke wò masukedana shishi kũni kohifidanazɔ kũni ijēnadinazɔ kũni sɔɔyādɔdanazɔ àna nanana ginaa furu'ani. Ka à nù ì watalu, ì fi'ani: Ma nàna, nanana ginaa ma kũ gbāda. Ma waaji mà nanana ginaa ma'ana dɔ̃. Ye à fi'ini kũni Suria yāzɔ à kè: Dɔmana nagū n dɔa kũni baanizɔ, Kiri! Nanana ginaa yā fi woninɔ n zɔkedanani, wó ì furua'nni. Kiri fi'ani: Yā ka ma dùcezo mà ke'anin lè: Anaaci

nanana ginaa kūni ì fayaaɓɓo fimaniba, wò a jējēa, wò a kwaacena kea buu. Anaa nanana ginaa kūni ì fayaaɓɓo deedeekemani kīn, má a kpetaa ɓɓɓɓɓɓ, á gbana lia a laada. À nanana ginaa fimani beɓe kūni ì fayaaɓɓo.

À cēē à fi'ini mɔɔɔ à kè: Kiri, nanana ginaa fi wonino n zɔkɛdanani, wó ì furua'nni. Ye kiri fi'àni: Ma dǎ shāashā ka ábi yā garaa, ka yā ka ma dūceɓɓo mà ke'ani a dǎ yāaji. Anaaci nanana ginaa fimaniba, yā guda du ginaa ye gbèegū'ani. A lekedukè àna bishejēmani kūni yāsorinaaɓɓo hari yā nà sori. À nanana ginaa yā fimani, magūa dǎa ka á fǎa à furu. Ye à fi'ini: Kiri, gūkan ba bii dunialu ka fǎa ina yā ka mbi wotukea lēe furuba. Kiri kan ba bii ina yā be taka wotuke masukɛdanama kūni kohifidanazɔ kūni sɔɔyǎdǎdanazɔba, baa kiri ashi ɓɓɓɓɓɓ. Kiri, yā ka mbi wotukea ginaa azu. Gūkan ba fǎa ina fi'nniba, sai Ladu, mɔɔɔ ì wei ba bii gu du kūni wo gucenazɔba.

Yā beɓe tù kiri zūn fà, ɓɓɓɓɓɓ, ì ke wò Babila dabalinalina dɛdɛ pai. Ka wò dabalinalina dɛdɛna yā ginaa kasheedikà, ye wòbi Danieli kūni ì gūnazɔ tǎa wòna à dɛdɛ. Ka kiri dogarina guce'ashi Arioki yà Babila dabalinalina dɛdɛɛji, ye Danieli yājerɛnadi fi'ini kūni laasaabu ɓɓɓɓɓɓ, ye Danieli ì ì làlu ì kè: Bɔyāaji kiri yā lufēde ginaa dī? Ye Arioki yā ginaa deedeekè Danielini. Ye Danieli yà ì wotukè kirima ina di gara jīn, ì gīnaa nanana ginaa furu'ini. Ye ì yà kpe, ì yā ginaa deedeekè ì gūnani Anania kūni Misaelizɔ kūni Azaliazɔ. Ì fi'àni àna wotuke Ladu Musunadima ina indawereke'àni nanana ginaa

kpetanaa musu, dun wònaba à dede kūni Babila dabalinaladi kenaba yāaji.

Gāoni Danieli werefugu wà, Ladu Musunadi nanana ginaa kpetanaa fi'ini, ye Danieli ì ì saabukpà ì kè:

Wògū Ladu saabukpa dipai,
ini ye dabali kūni gbādaazɔ ɔɔ.

Ita dina kūni lootoonazɔ sori,
ita kirina ka kirikeelu, ita à bɔlu,
ita dabali ka dabalinaladinani,
ita dōnaa kpa weregudanama.

Ita kpetanayā kūni yānazɔ ka duduna mɔ'ani,
ì gucii yāna dō, zaaka ini ye tà gufuke.

Ma n saabukè ma dijina Ladu, ma n tɔbò,
zaaka n dabali kūni gbādaazɔ lafàmani,
yā ka wo làlu'mma n deedeekèmani,
n kiri nananaa mōwoni.

Danieli kiri nanana furunaa

Ye Danieli yà Arioki ka kiri ì ì dì ì Babila dabalinaladina dede gu, ì ke'ini: Mba Babila dabalinaladina dedeba. Yaamazɔ kiri gu, má ì nanana furu'ini. Gube kyāakyāa Arioki Danieli shì ì yà'izo kiri gu, ì ke'ini: Gū ka fōa ina n nanana furu'nni ma wà Yahuda dēbuzɔnalu. Danieli ka wòta fi'ini mɔnɔ Belasaa, kiri ì làlu ì kè: Nanana ka ma kè ní fōa n fimani, n ì fayaa furumania? Danieli wì'ini ì kè: Dabalinaladi kan koo kohifida kan koo masukeda kan koo sɔrɔyādōda kan ba fōa ina yā kpetana ginaa

ka n làlu fi'nniba. Amaa Ladu bii musu, ini ye tà yã kpetanaa fi'àni. Kiri Nɛbukanɛza, yã ka nua lefũ Ladu mɔ̀nni. Nanana ka n kɛ̀ n wuceɓɔɔma kũni wɛɛfuguzɔ ka n wàn lè: Kiri, di ka n wùce n wuceɓɔɔma, n laasaabu yà yãma ka ì nua, ye Ladu ka tà yã kpetana furu yã ka ì nua mɔ̀nni. Mani kîn, ici ke ma dabali ye kpà gũkenala ye Ladu yã kpetana ginaa fimaniba. Ì fimani dun ò ì furunaa ma, laasaabu ka bii n zũnlu ò dõ.

Kiri, n guuwà ye n fɔkɛɛ wà n watalu du guceɔ. Ì ashi, ibi cɛkɛa mɔ̀nɔ ita tu wohu nà gũ kũ. Fɔ ginaa mii wula zallami, ì laru kũni ì ɔnazɔ anzarafumi, ì gberɛ kũni ì gbɛda'unazɔ mɔtɛɛmi, ì gbena mɔ̀omi, mɔ̀nɔ ì gbɛtaahina mɔɔ kũni jɛɛzɔmi. Di ka mbi waadɔa, gberɛ kɛɛ gbòro, ici ke gũkɛɛ ye ɔkɛmaba, ye ì nù ì fɔ ginaa gbɛtaahina ka bii mɔɔ kũni jɛɛzɔ wà ì wìwi. Dibɛɛdi mɔɔ kũni jɛɛzɔ kũni mɔtɛɛzɔ kũni anzarafuzɔ kũni wulaazɔ wìwi kyãakyãa, ye ì gbɛɛgũ du dawa kakazɔ ka bii fɔwɛɛwāgu. Ì gɪtaa kũni utuzɔ, wòci ì gbɛɛ wa mɔ̀nɔba, ye gberɛ ka guce taka ginaa wà gbɛɛgũ kàsa ashi nɔ̀nɔnɔ ka ì dunia fà pai.

Nanana ginaan bɛ. Kiri, wó furua'nni bɛɛ. Kiri, nnimi kirina kiri. Ladu Musunadi ì n kà kirikɛɛlu kũni iikozɔ kũni gbãdaazɔ kũni marekɛɛzɔ. Ì gucena kũni lahoolusɔ̀na kũni bãnazɔ nà'nni n ɔlu. Guu ka à bii pai nnimi à kiri. Nnimi wula mii ginaa. Kirike kɛɛ bɔa n gbɛ̀ji, iba burua n mujiba. Bɛɛ gbɛ̀ji ì adibi ì bɔa, ì ɔdaa duniama pai. Bɛɛmi mɔtɛɛ. Kirike shidibi ì nua, igũa gbãda du mɔɔzɔ, zaaka mɔɔ tà fɔpai wiwi ì ì ciibɔ. Laaka mɔɔ tà fɔ wiwi, laale ì kirike farashinana lɛɛɛa ì à ke bugubugu. Laaka n gbɛtaahina kũni gbeniazɔ wà, ì gu kena

lugudakɛda jɛɛ, ì gu kɛna mɔɔ, laalɛ kirikɛ ginaa gũa gbirina, amaa mɔɔ gbādaa gũa biilu, zaaka n wà mɔɔ dakũna kũni jɛ kpetenaazɔ. Laaka gbeni gu kɛna mɔɔ, ì gu kɛna jɛɛ, laalɛ kirikɛ ginaa gbirinaa gũa gbādaa zɔ mɔɔ ì gbirinaa gũa kasukasuna. Laaka n mɔɔ wà dakũna kũni lugudakɛda jɛɛzɔ, laalɛ gucɛ bɛna àgũa bii gubɛ dakũna, amaa àba kũkũaba, laaka n wà mɔɔ bata kũkũ kũni jɛɛzɔba.

Kirinano looto Ladu Musunadi ì kirikɛ inceɓadi kpa. Iba inceaba mɔɔ iba gbɛɛgũa bè kɛna mu dikamba. Ì kirikɛ farashinana ginaa kɛ bugubugu, ì à lɛɛa, ini igũa bii dipai. Laalɛ n wà gberɛ kɛɛ gbòro gberɛ ashima, ici kɛ gũkan yɛ ɔkɛmaba, yɛ ì mɔɔ kũni mɔtɛɛzɔ kũni jɛɛzɔ kũni anzarafuzɔ kũni wulaazɔ wìwi. Kiri, yā ka ì nua lefũ Ladu Ashinadi mɔ'nni. Nanana ginaa ba sɔnɔnaa zɔba, mɔɔ ì furunaa aminci zɔ.

Ye kiri Nebukaneza wùcɛ ì gberɛema Daniɛli watalu ì ɛrɛkùcɛ'ini, yɛ ì kɛ wò ì gba fɔ, wò turarecii ka'ima cɛma. Ì fi Daniɛlini: A Ladumi zɔnadina Ladu, kirina Zɔnadi yāda. Ini yɛ tà yā kpetanaa bɔ'ani gufuma, zaaka n fɔ n bòwoni kũni yā kpetana ginaazɔ. Ye kiri Daniɛli gbà gbāda, ì ì gbà fɔna gbāa, ì ì kà kirikɛɛlu inagũ werɛtɛɛa Babila cɛrɛma, ì ì dɪ Babila dabalinadina pai gucɛ'ashi. Daniɛli wotukɛ kirima, yɛ ì Sadaki kũni Mesakizɔ kũni Abɛdinɛgozɔ dɪ Babila cɛrɛ gbādanadina. Daniɛli kīn ì bii kiri wei.

Gũ à zuna mǎdeecegu cewi

Kiri Nebukaneza jìi firi kũni wulaazo du gucezo. Ì saake musu ɔkũsũ kee'a, ì luu ɔkũsũ soodu. Ye ì gifa Dura guwucenaalu Babila cerelu. Ye ì lekpelekè ì cere guce'ashinani à dakũ, kirina, yǎkpadana, dēbukedana wataluna, gbādanadina, kawerekpetadana, yājēdana, yāmɔkedana kũni ì cere kirikedanazo pai, à nù à fɔ ka ì firi ì gifa ginaa gbācibɔɔji. Ye cere guce'ashinano dākũ dɔma ginaa gbācibɔnaa musu, à duce ì watalu. Ye kasheedikada fi gbāani gbādagbāda ì kè: Cere pai gũna kũni bè paizo, yā ka wò dī'ani à ma. Anaa kuru unaa mà kũni sheeshezo kũni firizo kũni garayazo kũni kwansazo kũni kukūkefɔnazo pai, à kūsūkpete à miikuce jìi ka kiri Nebukaneza firi kũni wulaazo ì gifa ginaani. Gũ ka jè kūsūkpeteji ina miikuce'ini, wò ì zua mǎdeecegu ce fēdeelu kyāakyāa. Ì yāaji ye tù gũ nàa fɔnano unaa mà, cere pai gũna koo bè pai, àta kūsūkpete àna miikuce wula dɔma ginaani.

Di bee sɔɔyādɔda kena nù à Yahuda bè kena kiinekè, à fi kiri Nebukanezani: Dɔmana nagũ n dɔa kũni baanizo Kiri! Kiri, n dɔɔka dī n ke, gũ nàa kuru unaa mà kũni sheeshezo kũni firizo kũni garayazo kũni kwansazo kũni kucezo kũni kukūkefɔnazo pai, àna kūsūkpete àna miikuce dɔmaani ka n firi kũni wulaazo. N ke gũ ka ci kūsūkpete ina miikuce'iniba, wò ì zua mǎdeecegu ce fēdeelu. Too, Yahuda bè kena bii, n à dī Babila cere gbādanadina. À tɔmi Sadaki, Mesaki kũni Abedinegozo. Kiri, gũnana bata n yā maba, àbata zo ke n dɔmananiba, mɔno àbata miikuce wula fɔ ka n gīfaniba.

Ye Nebukaneza zūn fà nɔɔnɔɔ, ì ke wò nu'ani kūni Sadakizo kūni Mesakizo kūni Abedinegozo. Ye wò nù gūnanɔzo wò kpà'ini. Nebukaneza ì à làlu ì kè: Sadaki, Mesaki kūni Abedinegozo, ábi jea zókɛɛji ma dɔmanani yādaa? Ábi jea kūsūkpetɛɛji wula fɔ ka ma gɪfani koo? A soolu nà mà à kūsūkpetɛ à miikuce fɔ ka ma firi ginaani di ka ì kuru unaa mà kūni sheeshezo kūni firizo kūni garayazo kūni kwansazo kūni kucezo kūni kukūkefɔnazo pai, ì nɔɔ, amaa anaaci kuce'iniba, wò a zua mɔdeecegu ɛ fɛdɛɛlu kyāakyāa. Dɔma kpaci ye fɔa ina a bɔ ma ɔɔlu? À wì'ini à kè: Wóba cia'nni yā ginaazɔba. Kiri, wònaa wo zu mɔdeecegu ɛwi, wo Ladu ka wota zókɛ'ini ì fɔa ina wo bɔ, ina wo bɔ n ɔɔlu. Baa ka aci ke kimba, n dɔ ka wóba zókɛa n dɔmananiba. Wóba kucea wula fɔ ka n gɪfaniba.

Ye Nebukaneza zūn fà nɔɔnɔɔ, ì ì wɛrɛlufɛ'aji. Ì ke wò mɔdeecegu ɛ lafa ì kpà laaka wòta kela tara ɔɔfia. Ye ì fì ì dɛbukɛda gbāda kenani àna Sadaki kūni Mesakizo kūni Abedinegozo iri'iri àna à zu mɔdeecegu ɛ fɛde ginaalu. Ye gbādanadinano à à iri'iri kūni à asunazo ka à kà, tɔgɔna kūni dɔbɔnazo kūni fuuninazo pai, ye à à shìte à à zù mɔdeecegu ɛ fɛde ginaalu. Laaka kiri yāgɪfa zaza, mɔnɔ mɔdeecegu fudaakɛ nɔɔnɔɔ, ye ɛ fuda gbādanadinano ka à à zù wà ì à dède. Gū aanano kīn à sùte mɔdeecegu ɛ gbāda ginaalu iri'irina.

Ye kiri Nebukaneza gigikè ì kpɛte ì dùce fudafuda. Ì ì ibana làlu ì kè: Baa gū àa ye wò à zù ɛwi iri'irinaba? À wì'ini à kè: Laalemi kiri! Ye ì kè: À waado! Gū shii ye ma wà. À furuna, àbi likaa ɛ ginaalu, àci azumaba. À gū shidibi bɔ du Ladu Nizo. Ye ì nù mɔdeecegu le gu ì kè: Sadaki, Mesaki kūni

Abedinegozo, Ladu Musunadi zokedana, à bɔ. Ye à bɔ cewi. Cere guce'ashina kuni yākpadanazo kuni dēbukedana watalunazo kuni gbādanadinazo kuni kirinazo dākū'aji, à wà ce ginaa ci fĩ ina fɔkan ke'àniba, à mikākā ci cekūba, à tɔgɔna ci wuriba. Baa ce gbīn ba bii'ama sōba. Ye Nebukanēza kè: Wò Sadaki kuni Mesakizo kuni Abedinegozo Ladu saabukpa! Ì ì Mala'ika dē ì zokedana ka à yādaakpà'ini ì à faabakè. Zaaka yā ka ma gɪfa à jè keɛji, à shìte nnɔna ga, dun ànaba kūsūkpɛtɛ à miikuce zɔnadi kenaniba, sai à Ladu. Dɔɔka ka ma dìn lè: Gūkeɛ nà Sadaki kuni Mesakizo kuni Abedinegozo Ladu tɔ dɛ, cere pai gū baa bè kpacimi, wò ì katakataa, wò ì kwaace kea buu. Zaaka zɔnadi keɛ ba fɔa ina gū faabake laaleba. Ye kiri Sadaki kuni Mesakizo kuni Abedinegozo gbà gbāda Babila cerelu.

Nebukanēza nanana akɔ musu

Kiri Nebukanēza ye bi yā lè fia gūpaini, cere gūpai koo bè ka bii dunialu paimi, ì kè: Àgū bii kuni baanizo nɔɔnɔɔ! Ì kèmani nda ka dabodabona kuni mamaakinazo ka Ladu Musunadi kèmani mà fi'ani.

Ì dabodabona ashi fa!

Ì mamaakina gbāda.

Ì kirikeɛ ba inceaba,

ì iiko gūa bii dipai.

Mani Nebukaneza ka má bii ma wei shiu yākicibadi, ye ma nàna, ì tù wohu ma kù. Biina ma wucebɔɔma yā ka ma wà kūni laasaabuzɔ ka ma kè tù ma zūn kàta. Ma dì wò numani kūni Babila dabalínadinazɔ pai à nanana ginaa fimani. Ka kohifidana kūni dabodabokedanazɔ kūni sɔɔyāɗɗdanazɔ kūni masukedanazɔ nù, ma nanana ginaa yāfi'ani, àci fɔ à fùrumaniba. Gbēji Danieli ka wò ma jì tɔkà'ini, wòta fi'ini Belasaa, ì nù ma gu, ye ma nanana ginaa fi'ini. Ladu ka bii duna Nanii ì zɔ. Ma kè: Belasaa, dabalínadina guce'ashi, ma dɔ ka Ladu ka bii duna Nanii n zɔ, yā kpetanaa ba azu'nniba. Yā ka ma wà nananaalun lè. Ì furumani. Yā ka ma wà ma laasaabulu di ka ma wùce ma wucebɔɔman lè: Mabi guuwaa ye ma ako wà ducena cere buden, ì saake musu bakara. Ako ginaa ashikè ì gbādakù hari ì musu zè laduma. Wòta ako ginaa wa zaa dunia lema pai. Ì lalana nɔɔ, mɔnɔ ì ni'i bakara, ì fɔbinaa bùru gūpaima. Lahoolu sɔna uraa wà ì kucelu, mɔnɔ bāna tà nu àna kaka ì ɔninama. Fɔ hundinadi pai tà fɔbinaa wa'ima.

Mabi yā ginaa waa ma laasaabulu di ka ma wùce ma wucebɔɔma, ye ma mala'ika wà ì bò laduwei. Ì lezù gbādaazɔ ì kè: À ako ginaa anga, à ì ɔnina gu. À ì lalana katakata, à ì nina futē. À tu sɔna nà bashi àna bɔ ì gu, à tu bāna nà bɔ ì lalalu. Amaa à ako ginaa mikutu kūni ì misanazɔ tu cerelu, à mò gaaru keni kūni mɔtē fɔzɔ lahoolu gube. Fíri ì kpaa'ima, igūa bii lahoolu gube kūni sɔnazɔ. Ì mii ì soria, ì laasaabu ì gbēgūa du sɔɔ muzɔ hari wè sɔɔfia. Mala'ikana ye dɔɔka ginaa fi, Ladu gūna ye ì yā ginaa kasheedikà, dun gūna ka bii

nà dõ Musunadi ye iiko zɔ guce kirikenaama. Ita gũ ka kirikeɛlu laaka ì waaji, baa gũ gānadenaa. Mani kiri Nebukaneza, nanana ka ma kèn bɛ. Belasaa, n̄ furumani beɛɛ, zaaka ma kirikeɛ dabalinadi kan ci fõ ì fùrumaniba. N̄ f̄sa, zaaka Ladu ka bii duna Nanii n zɔ.

Danieli Nebukaneza nanana furunaa

Ye yā ginaa Danieli kũ ka wòta fi'ini mɔnɔ Belasaa. Laasaabu ka ibi kea tù ì zūn kàta. Ye kiri kè: Belasaa, m̄ba tu nanana ginaa yā kũni ì fayaa zɔ n wohu nà kũba. Ye Belasaa fi'ini: Ma zɔnadi, Ladu tu nanana ginaa nagũ bii n jedana yāmi. Ladu nà tu ì fayaa nagũ bii n jedina yāmi. Ako ka n wà, ì ashi mɔnɔ ì gbāda, ì musu z̄l̄ laduweima, wòta wa zaa dunia lema. Ì lalana nɔɔ, ì ni'l̄ bakara, ì fɔbinaa bùru gūpaima. Lahoolu s̄na bii ì kucelu, mɔnɔ bāna tà nu àna kaka ì ɔninama. Kiri, nnimi ako ginaa. N iiko ashi mɔnɔ n gbādaa zɔ. N marekɛɛ ashikè ì z̄l̄ laduweima, n kirikeɛ ɔdà hari dunia lema. Kiri, n mala'ika kɛɛ wà ì b̄ laduwei ì kè: À ako ginaa anga, à ako ginaa kakace, amaa à ì mikutu kũni ì misanazɔ tu cerelu. À mò gaaru keni kũni m̄t̄ muzɔ lahoolu gube. À tu f̄ri nà kpa'ima, igūa bii kũni lahoolus̄nazɔ hari w̄ s̄ɔfia.

Kiri, ì fayaan lè. Yā ka Musunadi d̄i ma zɔnadi kiri musun lè: Wò n kɛkɛa wòna n b̄ gucenalu, ngūa bii kũni lahoolus̄nazɔ, n̄ sh̄ɛ sua du diizɔ, f̄ri ì n wāa. Ngūa bii laale w̄ s̄ɔfia hari n d̄l̄ ka Musunadi ye iiko zɔ guce kirikenaama, mɔnɔ ita gũ kpa

kirikeelu laaka ì waaji. Laaka ì ke wò mikutu kùni ì misanazo tu, bee ke nna Ladu dǎ iikonadi, ì cǎa ina n ka kirikeelu. Ì yāaji ye tǔ kiri, ma yākpana lee ma. Kata n zunubima, ñ yāke ì jerema. Ñ n yāvānikenaa tu, ñ gucekeke taabinadinani, n ndamanaa ì difiaakea jīn.

Yānanao kiri Nebukaneza lì pai. Mo koori awerefiazo gbēji ibi taa ì wei kpe ashi musu Babila. Ye ì kè: Baa Babila ashi ka ma gifa ma kirikegun lebaa? Ma gifa kùni ma iiko gbādaazo ma kirike marekee yāaji. Hari yā ginaa boa kiri lelu, lɔkɔlu kee bò laduwei ì kè: Kiri Nebukaneza, yā ka wò fi n musun lè: Wò n bò kirikeelu. Wò n kekea wòna n bɔ gucenalu, ngūa bii kùni lahoolusōnazo, n shēe sua du diizo. Ngūa bii laale wē sɔɔfia hari n dǎ ka Musunadi ye iiko zo guce kirikenaama, mɔno ita gū ka kirikeelu laaka ì waaji. Gube kyāakyāa yā ka wò fi Nebukaneza musu kè. Wò ì kèke wò ì bò gucenalu, ì shēe sù du diizo, mɔno firi ì ì wǎ. Ì mikākā saakè i du dun kākāzo, ì ɔkɔko saakè du bāa ɔkɔkɔzo.

Ka wē sɔɔfia ginaa fà, mani Nebukaneza ma werekpète ma waadò musuji, ye ma cì ma laakalima. Ye ma Musunadi saabukpà, ma Dipainadi tobò, ma marekee dǎ'ini.

Zaaka ì kirikee ba inceaba, igūa bii dipai.

Gūna ka bii dunialu pai ba bii'ini fɔkamba.

Ita ke laaka ì waaji kùni gbādanadinazo ka bii musu
kùni gucenazo ka bii cere.

Gūkan bata ì leba,

gūkan bata fi'ini: Bó n kè gubeba.

Lootoo ka ma cì ma laakalima, ye ma cěe ma cì ma kirike darajazo kŭni marekěezɔ kŭni ashikěezɔ. Ma ibana kŭni ma cere gbādanadinazo à ma yā làlu, à ma kà kirikěelu, ye ma iiko kpà farashinaala. Mani Nɛbukaneza mabi musu Kiri saabukpaa bɛcɛ, mabi ì kpɛtaa, mabi ì tɔbɔa, zaaka ì fɔkɛnaa nɔɔ pai, ita yāke ì jerema. Gŭ ka tà a ginda shite musu ì fɔa ina ì labu.

Yā ka wò kě kpetātāama

Kiri Balazaa ì cere gbādanadina shìshi buki fɔbinaama gŭna dubu du, ye ibi inabi'i mia'àzɔ. Ka ì zŭn kè i ginaama nda, ì ke wò nu kŭni wula koohinazo kŭni anzarafu koohinazo ka ì diji Nɛbukaneza shìte Ladu kpelu Urusalima, ina imizɔ, ini kŭni ì cere gbādanadinazo kŭni ì nenazo kŭni ì wahainazo. Ye wò nù kŭni koohinanɔzɔ, àbi imiazɔ. Àbi inabi'i mia, jina ka wò à kè kŭni wulaazɔ kŭni anzarafuzɔ kŭni mɔtěezɔ kŭni mɔɔzɔ kŭni akɔzɔ kŭni gbɛɛezɔ àbi à saabukpaa. Gube kyāakyāa guce ɔɔbò fitila iji, ibi ɔgbɛ kěa kiri kpɛ tātāama ka wò bɔtɔkèma. Kiri ɔ ginaa wà, ibi ɔgbɛ kěa, ye ì laasaabu tù ì zŭn kàta. Ì werelu wùri, ì kpiti dɔkɔle bŭsā, ye ì gbekŭsŭna jigidà. Ì una gbādaa kè ì ke wò nu kŭni kohifidanazo kŭni sɔɔɔyādōdanazo kŭni masukedanazo. Ye ì fi Babila dabalínadinanɔni ì kè: Gŭ ka wāsā lɛɛ kyokè ì ì fùrumani, má godo gōbishe tɛɛ kŭni wula sheenizɔ kaa'ini, ì gbɛegŭa ma cere gbādanadina adibi. Ka kiri dabalínadinanɔ gè à pai, ye à gŭkan ci fɔ ì wāsā ginaa kyokè ì

fùru kiriniba. Kiri Balazaa zūn cĕĕ ì kàta nɔɔnɔɔ, ì werelu cĕĕ ì wùri, ye ì cere guce'ashina gbèegū bitilu.

Ka kiri nĕĕ kiri kūni cere guce'ashinazɔ kɔsɔngu mà, ì gĕ'aji fɔbikolu ì kè: Dɔmana nagū n dɔa kūni baanizɔ Kiri! M̃ba tu n laasaabu nà n zūn wuriba, m̃ba tu n werelu nà wuriba. Gūkĕĕ bii n cerelu lè, Ladu ka bii duna ì ì Nanii zɔ. N diji Nebukaneza looto wò wà ì laakali zɔ kūni weregunaazɔ kūni dabalizɔ du Laduzɔ. N diji ì ì dī weregudana kūni kohifidanazɔ kūni sɔɔɔyādɔdanazɔ kūni masukedanazɔ guce'ashi. Ì dabali kūni ì dɔnaazɔ gbāda, ita fɔpai ma. Ita nananana furu, ita shīn fayaa furu kūni yā azunadinazɔ. Ì tɔmi Danieli. Kiri tɔkàni mɔnɔ Belasaa. Ì ì shishi kīn, ì yā ginaa furua'nni.

Ka wò nù kūni Danielizɔ kiri ginaa gu, ye ì ke'ini: Nnimi dēbuzɔɔ ka wòta ke Danieli, ma diji bò'nzɔ Yahuda cerelua? Ma mà wò ke n Ladu Nanii zɔ, n laakali zɔ kūni weregunaazɔ kūni dabali gbādaazɔ. Wò nùmani bece kūni dabalínadinazɔ kūni kohifidanazɔ àna wāsā lee kyoke, àna ì furumani, amaa àci fɔba. Ma mà nta fĕ ì yāna furu, nta fĕ ì yā azunadina furu. Nna fĕ n wāsā lee kyokè n ì fùrumani, má godo gōbishe tĕĕ kūni wula sheenizɔ kaa'nni, í gbèegūa ma cere gbādanadina adibi.

Ye Danieli fī'ini: Ì n gbana kū, ì laada ke gūkeeni. Amaa má wāsā ginaa kyokea'nni kiri, má ì furua'nni. Kiri, Ladu Musunadi ye kirikĕĕ kūni ashikĕĕzɔ kūni marekĕĕzɔ kūni darajazɔ kpà n diji Nebukanezani. Laaka ì ì shīte musu laale, gūpai tà wohuma'ini, àta miikuce'ini, bè pai koo yāfī bè paimi. Gū ka ì waaji ina de, ita ì de. Gū ka ì waaji ina bɔ, ita ì bɔ. Gū

ka ì waaji ina gba gbāda, ita ì gba gbāda. Gū ka ì waaji ina ì labu, ita ì labu. Amaa ka ì ì ginda shìte musu m̀nɔ ì t̄nɔ gbādakù m̀nɔ ì burunakè, ye Ladu ì ì b̀ kirikēlu, ì ì marekē uru'ima. Wò ì kèke wò ì b̀ gucenalu, ì laasaabu gbèegũ du s̄w muzo. Ì bii kūni lahoolu fariganazo, ì shē sù du diizo. Fíri ì wà, ye ì d̄ bece ka Ladu Musunadi ye iiko zo guce kirikenaama, m̀nɔ gū ka ì waaji ita ì ka kirikēlu. Nni Balazaa, ì toimi nni. Baa ka n yānanɔ d̄ pai, nci n ginda labuba. N miishitekè Zonadi Musunadini. N tù wò nù kūni ì kpe koohinazo, ye nni kūni n cere guce'ashinazo kūni n nenazo kūni n wahainazo a inabi'i mìzo, ye jina ka wò kè kūni wulaazo kūni anzarafuzo kūni motēezō kūni m̀ozo kūni akozo kūni gberēezō n à saabukpà, fona ka àbata guuwaba, àbata yāmaba, ye àba d̄naa zoba. N hundii kūni n lefūzo bii Ladu zolu, ye nci ì kpetaba. Ì yāaji ye tù o ginaa nù ì wāsã ginaa kè. Yā ka o ginaa kèn lè: Mene, mene, tekeli, paashi. Yānanɔ fayaan lè:

Mene ke Ladu n kirikedina gò, ì ì le dùce.

Tekeli ke wò waado n gbĩtã lewa yĩbooma,

wò wà nci kilo shiba.

Paashi ke wò n kirikeε gbiria Medianani

kūni Paashinazo.

Balazaa yāfi, ye wò godo gōbishe tēē kūni wula sheenizò kà Danielini, wò kasheedikà wò ke, ì cɛɛ gbādanadina adibimi ini. Gāoni du ginaalu ye wò Babilonia kiri Balazaa dè. Madia bee ka wòta fi'ini Daliushi ye àcɛ ì gurubi ì wèē kee'a awerefiyaalu.

Danieli zuna musu'ashina èrɛɛlu

Ì kè Daliushini nda ina cere gbādanadina di gūna keesɔɔdu, ye ì à dīdī ì cerelu pai. Ì yākpada di gū à à wataluna. Danielimi gū aanano duumi. Cere gbādanadina tà à yāna deedeke yādakpadananoni, dun ànaba musaika kiriniba. Danieli dabali gbāda kpà yākpada kutuna kūni cere gbādanadinazola pai, ye kiri bōwi ina ì dī ì cere guce'ashi. Ye yākpada kutuna kūni cere gbādanadinazo àbi jere tōa àna fōke li'ima kirike ka ì bē ginaa musu, amaa iba taali zoba, àci fōkan li'imaba, zaaka ì aminci zo a fōkenaalu pai. Ibata pākpā yākeejiba, ibata tōro yākammaba. Ye à kè: Wóba fōkan lia Danielima dikamba, inaaba ì Ladu yāmanaa musu baashiba. Ye yākpada kutuna kūni gbādanadinazo dākū à yà à kiri lī à kè: Kiri Daliushi, dōmana nagū n dōa kūni baanizo! Wo cere wataluna kūni kirinazo kūni dēbukedana watalunazo kūni gbādanadinazo kūni yākpadanazo kūni à ibanazo pai, wo lēdākū wo wà ì nō ò dōka lē di, ò tu wò dīkinakema. Hari di kedokoori lēma gū ka wotukè dōma kēema koo gucema, inaaba nni ye ì wotukè'mma, wò ì shitea wōna zu musu'ashina èrɛɛlu. Kiri, ò dōka ginaa kē bece, ò n tōka takada lēlu, dun gūkan naba soriba. Igūa bii Mediana kūni Paashinazo dōka ka wōba fōa wōna lēdēba. Ye kiri Daliushi dōka ginaa dī ì ì tōkà takadalū.

Ka Danieli mà wò dōka ginaa dī, ì yà kpē. Ì igu ka bii kpē musu forona gūgu waadodo kūji kūni Urusalimazo Ye ì kùce ì wotukè Laduma ì ì saabukpà, laaka ita kē dipai tara aa'aa. Ye gūnanō nū à gē'aji, à wà ibi wotukea Laduma, ibi kucea'ini. Ye

à yà à kiri lì dɔɔka ka ì kè ginaa musu à kè: N dɔɔka dì n ke hari di kedokoori gũ ka wotukè dɔma keema koo gucema, inaaba n baashiba, wò ì shitea wòna zu musu'ashina èrɛlu. Kiri kè: Dɔɔka ginaa ba shika zɔba, ì gbèegũ Mediana kũni Paashinazɔ dɔɔka ka wòba fɔa wòna ledeba. Ye à f'i'ini: Yahuda cere dēbuzɔɔ Danieli bata n yākaba koo dɔɔka ginaa ka n kè. Ita wotuke Laduma dipai tara aa'aa. Ka kiri yā ginaa mà, ì kè'ini zaa nɔnɔnɔ. Ì wiji ina Danieli miishi, ye ibi ì bɔna jere tɔa hari usɔɔ sùte. Ye gūnanɔ dākū à nù à kiri lì à kè: Kiri, n Mediana kũni Paashinazɔ dɔɔka dɔ, wò ke dɔɔka ka kiri dì kũni yāzɔ ka ì jèji ba sorinaa zɔba. Ye kiri ke wò nu kũni Danielizɔ wò ì zu musu'ashina èrɛlu. Kiri fì Danielini: N Ladu ka nta kuce'ini dipai ina n bɔ!

Ka wò ì zù ère ginaalu, wò gberɛ shìte wò tà ère ginaa lema, ye kiri sheedukèma kũni ì kpɛ'ɔɔzɔ kũni ì cere gbādanadina kpɛ'ɔnazɔ, dun gūkan naba fɔkan sori Danieli musuba. Ye kiri yà kpɛ, ì jè fɔbiiji gāɔni bɛɛ, mɔnɔ ici ì negũ kan shishiba. Ici fɔ ì iwerekèba. Ka di kè saraazɔ, ye kiri ginaa kpète ì yà musu'ashina ère ginaa gu kyāakyāa. Ka ì nù kutu ère ginaaji, ì lezù Danieliji kũni zūnwurizɔ ì kè: Danieli, Danieli, Ladu hundinadi zɔkɛda! N Ladu ka nta kuce'ini dipai ì fɔ ì n bɔ musu'ashina lelua? Danieli wì'ini ì kè: Ladu nagũ n dɔa kũni baanizɔ Kiri! Ma Ladu a Mala'ika dè, ì nù musu'ashina le tà, àci ma marakeba, zaaka ma kè'ini yākebadi. Kiri, maci taali kan ke'nni dikamba. Kiri zūn kè nda nɔnɔnɔ, ye ì ke wò Danieli bɔ ère ginaalu. Ka wò ì bɔ, wòci ì duwere wa ì marakèba, ka ì Ladu aminci zɔ yāaji. Ye kiri kè wòna nu kũni gūnazɔ ka yāna

fī Danielima, ye wò à zùzu ère ginaalu kīn kūni à ninazò kūni à nenazò. Hari à burua cere, musu'ashina kùcè'ama à à kòròkòrò, à à yerena wìwi pai.

Kiri Daliushi takadakè gūnani ka bii ì cerelu pai, bè paimi, ì kè: Ànagū bii kūni baanizò nɔnɔ! Ma dɔka lee dì ma cere gūpaini. Àna Danieli Ladu wohuma, àna miikuce'ini.

Zaaka Ladu inimi hundinadi ka bii dipai.

Ì kirikeemi kirike incebadì, mɔnɔ ì kirikea dipai.

Ita gū miishi, ita à bò.

Ita dabodabona kūni mamaakinazò ke musu kūni cerezò.

Ini ye Danieli bò musu'ashina lelu.

Danieli sa'aalì Daliushi kirikedi kūni Paashi bè Sairushi kirikedizò.

Danieli werefuguwana lahoolusɔ guda shi musu

Babila kiri Balazaa kirikena wè farashinaalu ye Danieli werefugu wà, ì yākee wà ì laasaabulu di ka ì wùce ì wucebɔɔma, ye ì werefugu ginaa yā kè, ì ì yā mina fī. Danieli kè: Mabi guuwaa werefuguwanaalu gāɔni, ye ma laduwei utu wà guda shi, àbi kpɛtea tekun ashima. Ye lahoolusɔ ashi guda shina bò tekulu, à bee dunaduna kūni. Farashina bò musu'ashiji, ì dun shīnna zò. Ka mabi waadɔa, wò ì shīn ùru'ima, ye wò ì shìte wò ì dùce gbɛ fiaama du guceɔ, ye wò guce zūn kpà'ini. Ye ma lahoolusɔ fiadibi wà, ì kè du kpaguzò,

ì hangasukena, tātāyere guda à kpana ì lelu. Ye wò f'ini ina kpete ina s̄w su n̄w̄w̄. Bɛ gbēji ma guuwà, ye ma lahoolus̄ kɛ wà, ì b̄ s̄fuuji. Ì sh̄inna z̄ a kpirima guda shi, m̄w̄ ì mii shi. Wò ì kà kirikeelu. Bɛ gbēji ka mabi guuwaa wɛfugu ginaalu ḡw̄ni laale, ma lahoolus̄ shidibi wà, ita tu wohu nà gū kū hari ì z̄n nà kàta. Ì gbādaa ba saara z̄ba. Ì s̄nami m̄w̄ m̄w̄w̄ à ashi, ita f̄ suz̄w̄ ina wiwi, ita bɛɛ ì kutuuma ka gbègū. Ì duna k̄ni lahoolus̄ farashinaaz̄. Ì b̄ koori. Ka mabi laasaabukea ì b̄n̄w̄ yāma, ma b̄ kɛ wà j̄nj̄n, ibi b̄a'alu, ye b̄ farashina guda à ùru, à guu b̄'ini. Ma wà b̄ j̄n ginaa wɛ z̄ du gucez̄. Ì l̄ z̄ m̄w̄w̄, ita buruna yāfi.

Ka mabi waad̄a laale, ma wà
wò guruna kà, ye Mare Jidaa n̄ ì àɛ.
Ì asuna fu du abuz̄,
m̄w̄w̄ ì mikākā bii du tambu kākā dinz̄.
Ì guru bi cenene b̄a
m̄w̄w̄ ì gerena bi firia du cɛbeelaz̄.
Cɛ gooru b̄ ì kucelu, ibi bashia ì watalu.
Gūna dubu tara keekoori bi ì ibaa kɛ,
m̄w̄w̄ gūna ka d̄cɛ ì watalu b̄ru milian kees̄ru.
Yāj̄dana àɛ, ye wò takadana ḡgu.

Mabi waad̄a buruna yā ka b̄ ginaa bi fia yāaji, ye mabi waad̄a hari wò lahoolus̄ ginaa d̄, wò ì gee kākace wò shite wò z̄ c̄wi. Wò lahoolus̄ kena b̄ kirikeelu, amaa w̄ci à hundii b̄ba hari d̄kɛdi.

Ka mabi guuwaa ḡw̄ni wɛfugu ginaalu laale, ma f̄ wà du guce n̄z̄, ibi nua búrunaz̄. Ka ì b̄ru, ye wò k̄'ini watalu wò

yà'izɔ Mare Jida ginaa gu. Wò ì kà kirikeelu, wò iiko kpà'ini kùni marekɛɛzɔ, ye gūpai kùce'ini, cere pai gū koo bè paimi. Ì iiko gūa bii dipai, iba inceaba, mɔnɔ ì kirikeɛ ba legaa dikamba.

Werefugu ginaa furunaa

Mani Danieli ma zūn wùri. Fɔ ka mabi waa ma laasaabulu tù ma zūn kàta. Ma nù kutu gū duu guu ka dùce gube, ma yānana yādaa làlu'ima pai. Ye ì yāfimani ì yānana fùrumani. Lahoolu sɔ ashi guda shiinanɔmi kirike guda shii ka à bɔa dunialu. Amaa Musunadi gūna ye à kirikeɛ shia, ì gbɛegūa'ani hari dipai, iba inceaba. Bɛ gbɛji má waaji màgū yādaa dɔa lahoolusɔ shidibi musu. Ì duna kùni lahoolusɔ kenazɔ, ita tu wohu nà gū kù ì kpà à paila. Ì sɔnami mɔɔ, ì ɔkɔkɔnami mɔtɛɛ, ita fɔ su ina wiwi, mɔnɔ ita bebe ì kutuuma ka gbèegū. Bɛ guda koori ka bii ì miima má waaji màgū ì fayaa dɔa mɔnɔ kùni bèzɔ ka bɔ ye bɛna guda à ùru à guu bɔ'ini. Bɛ ginaa were zɔ kùni lezɔ, ita buruna yāfi mɔnɔ ì bii ducea gbādaa ì kpà ì kutunala. Ka mabi waadɔa, bɛ ginaa bi dɛbuukea kùni Ladu gūnazɔ, ibi à bia dɛbuuma. Ye Mare Jida ginaa nù ì yā ndaa kpà Musunadi gūnanɔni, zaaka kirikeɛ gbɛegūna Ladu gūna mu lootoo ye bùru.

Wò fimani wò kɛ: Lahoolu sɔ guda shidibi ginaami kirike shidibi ka ì bɔa dunialu. Ì duna kùni kirike kenazɔ, ì dunia pai bia, ina utɔma, ina wiwi. Bɛ guda koorinanɔmi kirike ginaa

kiri koori ka à kirikea. Kiri ka duna kûni ì farashinanazo ì kpetea à gbēji, ì kiri aanano bɔa kirikeelu. Ì lalufuru Musunadima, ì gbādaamo ì gūnani, ì t̄a ina à bukina sori kûni à dɔkayāzo. Wò Ladu gūna nà'ini ì ɔlu wē à kûni kutuuzo. Amaa yājēdana à acea à ì bɔa kirikeelu, àna kirike ginaa kakace shāashā hari dipai. Wò dunia kirikena pai kirikee kûni iikozo kûni ashikeezo kpaa Musunadi gūnani. Ì kirikee ginaami kirike incebadi, mɔno kirikedana à kūsūkpetea'ini àna miikuce'ini à pai. Yā ginaa len be. Mani Danieli, ma laasaabuna tū ma zūn kàta nɔnɔ, ma werelu wùri, ye ma yā ginaa kû ma zūnlu.

Danieli wotukena Laduma

Ahazuru ni Dariushi, Madia bee, kirikena Babilonia cerelu wē farashinaalu, mani Danieli yā ka Zɔnadi fi annabi Irimiani ma wà takadalu ì ke, Urusalima ì gbēgūa wei jidaa wē kee'awokoori. Ye ma eredò Zɔnadi Ladu biiguma ma kūsūkpete'ini, ma wotukè'ima kûni le'irinaazo, ma àce buuma kûni zagaranazo kana. Ma wotukè Zɔnadi ma Laduma, ma ma gūna zunubina fi'ini. Ma kè: N yā nda Zɔnadi Ladu. N ashi, nta tu wòna n wohuma. N i biina kûni gūnazo ka waa'nji àta miikuce yānani ka n gifa nta kû winaalu. Wo zunubikè wo yāvānikè. Wo taalikè'nni, wo t̄nɔgbādaakè. Wo bò yāna gbēji ka n gifa kûni n dɔkanazo. N zokeda annabina yāfi wo kirinani kûni wo kirikedanazo kûni wo dijinazo kûni wo cere

gūnazɔ pai kūni n tɔzɔ, ye woci n yā maba. Zɔnadi, n nɔɔ. Woninɔ kīn wo gbèegū kūni unizɔ cece, woni Urusalima gūna kūni Yahudanazɔ pai kūni Isra'ilanazɔ ka bii kutu kūni Isra'ilanazɔ ka bii sàa biina cɛrenalu ka n à fùtē à bɔna n gbēji yāaji pai. Zɔnadi, uni wo kù zunubi ka wo kè'nni yāaji, woninɔ kūni wo kirinazɔ kūni wo kirikedanazɔ kūni wo dijinazɔ. Zɔnadi wo Ladu, baa ka wo tɔnɔgbādaakè, n indawerɛ zɔ kūni suruzɔ. Zɔnadi wo Ladu, woci miikuce'nniba, woci dɔ dɔɔkayānamaba ka n dāda n zɔkeda annabinani à fiwoni. Isra'ilana pai kàsa n dɔɔkalu, à jè n yā maaji. Ye n wo laalikè ka wo zunubikè'nni yāaji, laaka n fi n zɔkeda Musa dɔɔka takadalu. Yā ka n kɛ ì wo lia n kèwoni kūni wo watalunazɔ. N musaikèwoni, yā ka Urusalima lì wòci ì taka wa dunialu yāaba. Wo Ladu, yā ginaa wo lì laaka ì yā bii Musa dɔɔka takadalu, amaa woci n gu tɔba, woci miibɔ wo zunubinalu wo laakalikè n yādaamaba. Zɔnadi wo Ladu, n weretèe wo yāji, ye n musai ginaa kèwoni, zaaka n yā tagū nda n fɔkenaalɔ pai, ye woci n yā maba. Zɔnadi wo Ladu, woni gūna ka bii n mu n wo bɔ Masar kūni n ɔ gbādaazɔ, n tɔbɔ laaka ì bii hari cece. Wo zunubikè, wo taalikè'nni.

Zɔnadi, laaka n fɔkenaa nɔɔ pai, n zūmfanaa kūni n fēdɛɛzɔ were n fara Urusalima kūni n kàsa ashizɔma bɛɛ, zaaka Urusalima kūni woni gūnazɔ ka bii n mu wo gbèegū iabɔɔ gūnani ka likanawoji pai wo zunubi kūni wo dijina yāvānikenaazɔ yāaji. Wo Ladu, mani n zɔkeda wotu ka mabi kɛa'mma shi bɛɛ kūni ma indawerɛ unaazɔ. Waadɔ n biiguji ka kàkacɛ n tɔ yāaji. Ma Ladu, tɔnɔle n ma yāma. Fara jidaa

ka n tɔ biima ñ werekpete ñ wà. Ici ke wo nɔkke yãaji wóbi wotukea'mmaba, n indawere ashi yãajimi. Zɔnadi, ñ mà yãma! Zɔnadi, suruke! Zɔnadi, tɔnɔle ma yãji, ñ ke kyãakyãa! Ma Ladu, mba geekɛba n tɔ yãaji, zaaka n tɔ bii fara ginaama kũni n gũnazo.

Wɛ sɔɔfia tara kee'awokoori yã

Lootoo ka mabi yãfia laale, mabi wotukea, mabi ma zunubi fia kũni ma gũ Isra'ilana muzɔ, mabi surulalua Zɔnadi ma Laduma ì kàsa musu, ka mabi wotukea laale, Jibirilu, gũ ginaa ka ma wà werefuguwanaalu yãa kpète ì nù ma gu itɔkke sãmakedi. Ì yãfɪmani ì kè: Danieli, ma bò ma nù'mma dun mà n were gu'nni, n dɔnaa nà lafa. Ka n farashì wotukenaani, Ladu cì'nni, ye ma nù mà fiiji'nni, zaaka ì gũ widami nni. Laakalike yã lɛema, laasaabuke werefuguma ka mbi waa. Ladu wɛ sɔɔfia tara kee'awokoori jɛ n gũnani kũni n fara ginaazo, dun ina taalina lɛde ina zunubi ince, ina lalata yã vãninama, ina bɔ kũni fɔnɔkke incebadizo, werefuguwanaa kũni annabikeekenaazo le ì burua, wò Ladu kpe legu. Laasaabuke yã ginaama, ñ dɔ ka zaa lootoo ka wò dɔka kè Urusalima cɛe ina cì ì ba jidaalu hari ì bùru kiri ka Ladu kà nudima wɛ sɔɔfiafia tara sɔɔfia kũni wɛ sɔɔfiafia tara kee'a awerefiazɔmi. Wò Urusalima cɛea wòna gifa, wò ì kacɛrena mɔkke kũni jerenazo, amaa taabi gũa bii looto bɛɛ. Wɛ sɔɔfiafia tara kee'a awerefiazɔ gbɛji wò Ladu gũ ginaa kata, gũkan ba ducea'izɔba.

Kiri ka bi nua dēbukedana à fara ginaa kakacea kūni Ladu kpezo. Ì le ì burua du izo ka malaalakè fɔnama. Hari ì le bùru dēbukenaa kūni kakacenaazo gūa bii laaka Ladu dī. Kiri ginaa ì lekedukea kūni gūnazo gbāa hari wè sɔɔfia. Wè sɔɔfia ginaa buden ì sāmakenaa kūni sarakenaazo ledea, ì tē ka wòta jeji gifaa gube hari kakacena lia ka Ladu dī'ini.

Darajanadi bò nuna Danielima

Paashina kiri Sairushi kirikena wè adibilu wò yā fitikè Danielima ka wòta fī'ini mɔno Belasaa. Yā ginaami yāda mɔno dēbu ashi yāmi. Ì yā ginaa mà ì werefugu ginaa dō.

Looto bɛɛ mani Danieli, ma zūn wùri hari dura à. Maci fɔbina ndaa biba, sɔɔ koo inabi'i ci gè ma leluba. Maci yōno dɔkɔba hari dura à ginaa ìnce.

Mɔ farashina di keedu awereshizɔdibi ma dùce gooru ashi ka wòta kɛ Tigrishi kutu. Ma werɛkpète ma guuwà, ye ma gūkɛɛ wà ì asu fuu kana mɔno ì wula zalla bɛɛ ìri a kpitima. Ì duwere bò du gberɛ darajanadizo, ì werelu bii du yēmekenaazo. Ì were bii du cɛbeelazo, ì ona kūni ì gbenazo bi cɛkɛa du mɔtē jirikenaazo. Ì lɔkɔluu bii du gbāa kɔsɔnguzo. Mani Danieli ma werefugu ginaa wà ma din. Gūna ka biimazo ci waba. À zūn kàta, ye à bashì à dùdu. Mani ye ma gbèɛgū ma din, mabi werefugu ashi ginaa waa. Ma gbādaa ìnce, ma werelu wùri, ma gbèɛgū gānadena.

Ma ì lɔkɔluu mà, ye lootoo ka mabi maa, iwere ma dèdè gbāda, ma wùcɛ ma gbɛrɛema. Ye wò ɔnàmama wò ma shìtɛ wò ma kùcɛ ma kūsūnama kūni ma ɔnazɔ, mabi lukpakpaa. Ye wò fimani: Ladu gū wida Danieli, laakalike yāma ka mabi fia'nni. Kpɛtɛ ñ ducɛ, zaaka wò ma dɛ'mma. Ka ì fimani laale, ma kpɛtɛ ma dùcɛ, mabi jigidaa. Ye ì cɛɛ ì fimani: Danieli, mba tu wohu nà n kūba, zaaka zaa lootoo farashinaa ka n n zūn kpà laasaabukenaama mɔnɔ n n ginda làbu Laduni, ì shì'nni. N yā ginaa yāaji ma nù. Paashi kirikɛɛ mala'ika kiri jɛrɛ lèmani di keedu awereduzɔ, ye mala'ika kirina du Mika'ilu nù ì ɔkàmani, ye ma ì tù gube Paashi kirinazɔ. Yā ka ì n gūna lia di gbɛji ma nù mà furu'nni, zaaka wɛrɛfugu ka n wà lɛfū yāmi.

Lootoo ka ibi yā ginaa fiamani, ma miizɔ cɛɛ, ma lɛfū shiu. Gū ginaa ka bò du gucɛzɔ ɔkè ma lɛma, ye ma lɛgù ma yāfi. Ma fi gū ka dùcɛ ma watalu: Zɔnadi, ye zūnwurina kàmama fɔ ka mabi waa yāaji, ma gbɛɛgū gānadɛna. Zɔnadi, laala mani n zɔkɛda má fɔa mà yāfi'nzɔ? Mába gbādaa zɔ mɔnɔba, mabai wigu lia mɔnɔba. Gū ginaa ka bò du gucɛzɔ cɛɛ ì ɔnàmama ì ma gbà gbādaa ì kè: Ladu gū wida, mba tu wohu nà n kūba. Ngū bii kūni baanizɔ! Ñ n duwɛrɛ wɛrɛ! Zūngbādaake! Ka ì yāfimani, ma gbādakū, ye ma kè: Zɔnadi, yāfimani bɛcɛ, zaaka n ma gbà gbāda. Ye ì kè: Yā ka tù ma nù n gu n dɔa? Má cɛɛa mà yaa dɛbuuji kūni Paashina mala'ika kiri ginaazɔ bɛcɛ. Manaa yaa, Gereshina mala'ika kiri ì nua. Amaa yā ka bii yāda takadalu má fia'nni gīna. Gūkan ci ducemazɔ kirinanɔ yā musuba, sai ani Isra'ilana mala'ika kiri Mika'ilu baashiba.

Incenadina

Dibɛɛdi Mika'ilu, gbādanadi ashi ka tà duce kŭni n gŭnazo ì kpetɛa. Looto be taabi gŭa ashi. Zaa bena farashinadi hari lootobɛɛ, ì taka ci ke yāaba. Lootobɛɛ n gŭna ka à tɔ bii Ladu takadalu à bɔa. Gŭ gbāana ka bi iwerekɛa cerɛlu à kpetɛa. À gŭkɛna gŭa bii hundi incebadimu, à gŭkɛna kŭn zŭmbɔnaa kŭni uni incebadizo mu. Gŭna ka dabali zo à cɛkɛa du musu fɔnazo. Gŭnazo ka tà tu gbāa nà bɔ nda à ikɛa du sɔrɔnazo. Nni kŭn Danieli, yānazo ka takadalu, n tata hari di ginaa le burua. Gŭ gbāana yaa wòna ci ina dōnaa lafa.

Mani Danieli ma guuwà, ye ma gŭ fiaa wà, duu dùcɛ gooru lema lè, duu baaji. À gŭ duu fi gŭni ka kutta kana ì dùcɛ gooru i musu ì kè: Mamaaki yānazo à incea di kpaci? Gŭ ginaa ka kutta kana ì dùcɛ gooru i musu ì ì ɔbiceɛ kŭni ì ɔjengɛɛzo shìte musu, ye ma mà ì fi kŭni Dipainadi tɔzo ì kè: Wè à kŭni kutuuzo. Wònaa Ladu gŭna ɔ fɛ'ani à gbɛji wòna ince, ye yānazo à incea pai. Ma mà, amaa maci ì fayaa dōba, ye ma ì làlu: Zɔnadi, yā ginaa ì incea laala? Ì wìmani ì kè: Danieli, yaa! Yānazo fayaa gŭa tatana, wò fɔ kucea'ama hari dina lema. Dibɛɛdi gŭna gbāci ì urua gbāa, à zŭn ì fuukɛa laaka wò à kookè, amaa gŭ vānina à takpaa ànagŭ kɛa vāni. Gŭ vāni kan ba yā ginaa maaba, gŭna ka dabali zo ye à maa. Wònaa sāma ka wòta ke dipai ledè, wò tɛɛ ka wòta jeji gifa, di keekoori sɔɔdu kŭni keeshiwokoori gŭa bii. Albalikanadi gŭ ka di keekoori sɔɔdu kŭni keesɔɔdu awokoori aweresɔɔruzo dāa ina buru. Nni kŭn yaa hari n dina lema. N dunia tua n kpetɛa n búru n laadama dina lema.